

Nua duai ir l'Europa?

In intschess da valurs cuminaiylas

DA GUIU SOBIELA-CAANITZ

Ils onns novanta ans han manà la surprisa ordvart penibla da vesair noss pajais disfamà dals medis da massa internaziunals. Anc pli ch'inculpaziuns vairas u faussas duleva l'intervenziun d'in sutsecretari da la gronda democrazia americana; lez parava suvert da tractar la Svizra sco ina scolara talentada, però dormulenta, che basegnia adina puspè stimuls d'in magister bainvulent. Pir endretg vainsa lura chapì che la fin da l'Uniun sovietica, pia era dal mund bipolar, ha anc sminù il pais d'ina Svizra che quinta be 7 miliiuns olmas, gis sco quel da Belgia, Bulgaria e Croazia (respectivament 10, 8 e 5 milliuns). Nagin da quests quatter stadiis è numnà en il text da «The Grand Chessboard» («La vasta tavla da schah»), il davos cudesch da Zbigniew Brzezinski, politolog american da derivanza polacca, antruras cussegliader da president Jimmy Carter e lura professer a l'Universitat da Washington DC. Tgi che vul encleger perge ch'ils Stadiis unids (SU) na sa sentan pli obligads da schanegiar pajais pitschens d'Europa, e nua ch'els mettan prioritads per ils onns proxims, dess leger lez tom cun attenziun. L'analisa che suanda sa basescha sin l'ediziun tudestga (1).

Per ina visiun europeica

Ins spetgass bainvulentscha da l'autur almain per la Gronda Bretagna (59 miliiuns olmas), alliada istorica dals SU. Il cuntrari! «Ella n'ha nagina visiun ambiusa per l'avegnir d'Europa (...). Londra ha quasi prendì cumià dal gieu europeic (...) e paussa sin sia grondiusa arbara» (pp. 69–71). «Il gieu europeic» tenor Brzezinski vul dir «derasar plaun a plaun relaziuns democraticas enfin en la profunditat d'Eurasia» (p. 89). En lez senn lavuran «ils architects principals d'Europa, numnadament las elitas politicas» da Frantscha e Germania (pp. 93–94). L'autur giavischia che noss continent sa rinforzia: «In'Europa pli gronda che la summa da sias parts, pia in'Europa che vesess sco ses pensum mundial da derasar la democrazia ed ils dretgs umans, mettess probablament fin a l'extremism politik, al naziunalism bornà ed al hedonissem social» (pp. 111–112). Il hedonissem (dal grec antic «hedone» che vul dir «plaschair») è la «cardientscha en

il plaschair sco il bain il pli custaivel e l'atgna finamira dals umans» (2). Brzezinski manegia ch'il sistem social surchargia adina dapli l'Europa dal vest, «indebleschia sia economia» (p. 93) e promovia «in hedonissem che guntgeschia la realität, cun in vid spiertal ch'extremissem naziunalists ed ideologias dogmaticas pudessan nizzegiar» (p. 111). L'Europa, en auters pleuds, basegna in ideal da cuminanza.

Da Maroc a la Pologna

En lez senn definescha l'autur duas ambiuzins essenzialas da l'Uniun europeica (UE). Cun l'emprima spera la Frantscha da «reacquistar sia grondezza d'antruras» (p. 94); ella vul «restar preschenta sco factur da segirtad en ils blers pajais francofons d'Africa» (p. 97). Brzezinski preciescha: «Sco il partenari principal da Maroc e Tunesia gid'la a stabilisar l'Algeria (...). Senza la persasiun da Frantscha ch'ella haja in'atgna missiun fiss la flanca sid d'Europa bler pli instabla. Tut il mezdi dal continent patescha adina dapli da las smanatschas socialas e politicas che derivan da l'agitaziun lung la costa sid dal Mar mediterran» (p. 119). In fretg da l'actividad franzosa en Africa è il patg da Lomé (Togo) ch'admetta senza dazi en l'intschess da l'UE 99,5% dals products da settanta pajais en svilup. Fundamentalà è dentant la segunda ambiuzin da l'autur, numnadament consolidar la democrazia en pajais d'Europa centrala e da l'ost entras lur adesiun a l'UE e l'Organisaziun dal patg da l'Atlantic nord (OPAN). «Lezza vista ha già dà a Slovacchia, Ungaria e Rumenia il stimul basignaivel per cuntascher cunvengnas tenor las normas dal Cussegli d'Europa» (pp. 125–126). La Germania ha sa cumprovada sco motor d'amadus schlarginaments: «Sia sfera d'interess vers damau cumpiglia ils pajais deliberads dal communissem cun Estonia, Lettonia, Lituania, Bielorussia ed Ucraina (...), pia l'intschess istoric da l'influenza constructiva tudestga entras fundaziuns da citads e colonisaziun purila (...). La Germania reunificada ha renconuschi sco definitiv ses cunfin nov cun la Pologna (...) e ha sustegni decisament la comembranza da lezza en l'UE e l'OPAN» (pp. 105–106). Quai deriva d'ina veglia tradiziun geopolitica. Almain la mesedad da l'intschess polac actual, cun nov da las sedesch chapitalas provin-

zialas, fascheva part enfin 1918 da Prussia e lura Germania, t. a. Poznan e Wroclaw che quintan oz mintgina passa in mez milliun olmas ed avevan num lezza giada Posen e Breslau.

La Russia sco quità

Tanscha l'Europa be fin al cunfin polac vers damaun? Brzezinski punctuescha che «l'Europa unida en via da furmaziun na sa fundia be sin ina cultura cuminavia, mabain cumpiglia er ina maniera da viver, in standard da vita ed in urden politic cun normas democraticas» (p. 123). El citescha la definiziun d'Europa tras president Václav Havel: «In intschess da valurs cuminaiylas» (p. 122). Tenor l'autur duai l'UE recepir era pajais da tradizion ortodoxa, sco già la Grezia, e cunzunt l'Ucraina (50 miliiuns olmas), tant pli che «l'identidad naziunala da lezza na derivia pli, sco antruras, d'in'ostilitad encunter Pologna e Rumenia, mabain sa restrenschia a resister a tuttas propostas russas d'integrazion» en «cuminanzas» dominadas da Russia (p. 165). L'Ucraina è l'emprim anè d'ina chadaina da var 4200 km che cumpiglia t. a. la Georgia (5,5 miliiuns olmas) e tschintg pajais musulmans da linguatg tirc, enfin als culms da Tienschan (7439 m), al cunfin da la Regiun autonoma uigura (era tircofona) en China. Ils otg stadiis giuvens da lezza «chadaina eurasistica» è smanatschads da Russia (strusch 150 miliiuns olmas) nua che «biocrats sovietics d'ina giada domineschan il Ministeri da l'exterier» (p. 81) e n'han tuttina betg prendì cumià dal passà: «L'influenza persistenta dal communissem è simbolizada dal monument a Lenin en il center istoric da la chapitala. Tge manegiass ins (...) d'in monument a Hitler amez Berlin?» (p. 154). L'autur recumonda da persvader la Russia «ch'ella stoppia cunzunt sa modernisar, empè da sa stentat adumbatten per reacquistar sia posiziun da pussanza mundiala. Ses intschess è uschè vast e varià ch'in sistem politic decentralisà, basà sin l'economia da martgà, augmentass las pussaivladads da sviluppar la creativitat dal pievel russ, las enormas ritgezzas natiralas dal pajais e la resistenza a la propaganda per ina said da pussanza (...). Plinavant duess ins consolidar la varietad geopolitica [da la 'chadaina eurasistica'] (...) per resister ad ina renaschientscha eventuala da la smanatscha russa» (pp. 288–289).

Enturn il Caucasus

La guerra da Tschetschenia, cun ils malfatgs da la soldatesca, e la derasaziun dal naziunalismuss mussan puspè la vart trida e detestabla da Russia che millions Europeans ed Asiatis han stuì endirat per decennis. Brzezinski fa endament «la resistenza incunparablamain zaia» (p. 204) dals Tschetschens encunter ils conquistadars russ en il 19avel tschientaner. Gist da l'autra vart dal Caucasus sa chatta la Georgia, conquistada da Russia 1804–1810 e puspè 1921. «La guerra da Tschetschenia fa grond quità a la direzioni da Georgia e ha be anc rinforzà la schientzcha d'ina smanatscha russa. Pli cleramain ch'enfin ussa giavischia president Schevardnadse l'adesiun da ses pajais a l'OPAN e la partenza da las truppas russas da Georgia» (3). Lezza cunfina cun la Turchia (64 miliiuns olmas), veglia commembra da l'OPAN che vegn a fantschentar l'UE durant ils onns proxims. Sco candidata uffiziala a l'adesiun na satifa la Turchia tuttina betg a las pretensiuns da l'UE areguard ils dretgs umans; ins la renfatscha «la tortura, schizunt la tortura spezialmain inumana d'uffants, lura bleras morts en praschuns, execuziuns senza process, la refusa d'ina gistica correcta ed autonoma sco era da l'exercizi liber da la religiun e l'acziun sindicala» (4). A questa glista ston ins anc agiunscher la refusa da tuts dretgs culturals al pievel curd (var 20 % da la populaziun), l'intervenziun repetida da l'armada tirca en il gieu democratic e l'occupaziun parziala da Cipra. Brzezinski taschenta tut quai tar sia posiziun a favur d'ina recepziun da Turchia en l'UE sco punt vers l'intschess tircofon d'Asia. Igl è il sulet punct da cuntraversa en in manual che sporscha explicaziuns ordvart cleridas, 23 skizzas cartograficas ed in register da passa 200 numbs.

1) Zbigniew Brzezinski, *Die einzige Weltmacht. D-69469 Weinheim e Berlin (Belz Quadriga, ISBN 3-88679-303-6)* 1997.

2) Sara Tulloch (ed.), *The Reader's Digest Oxford Wordfinder*, Oxford (Clarendon Press, ISBN 0-19-863118-9) 1993, p. 694, artitgel «hedonism».

3) Georgien sucht Schutz beim Westen, en: *Neue Zürcher Zeitung*, 17 da november 1999, p. 5.

4) Menschenrechte als Herausforderung in der EU, en: *Neue Zürcher Zeitung*, 16 da mars 2000, p. 3.